

## Nûjenî anga afrandin di helbestê de

**H**elbest an ku peyvên ciwan û tijî hest, ne ji valatî, ne ji êş û ne ji kêfxweşiyê dihê weku ku em gelek dihîzirin, lewma çî cara nivîsîna peyvê ji valatiya naxê mirov an ku êşên kesyatî nahêt, belku ew hemû bi xwe tevliheviyeke hiziriye. Vêca ev hizir çî bi rêk û pêk hatine daraştin, an jî mîna komeke rengên germ hatine ber çavên me, wî wextî em dibêjin û şîrove dikin an jî em bi xwe felsefêkî jê re çê dikin. Lewma her kesê ku heye dihizire, wate hizira wî, wî bi me dide naskirin.

Hizira nû mirovê nû dide naskirin û em wî di riya wê hizirê de nasdikin, hizira kevin jî mirovê kevin dide naskirin, an ku ta çî radyî wî kesî kariye xwe biguherîne. Carina ew hizir dibe ku helbestek be, dibe ku çîrokek be, dibe ku di nava perên romanekî de be.



**Mesûd Xelef**

*“Nivîsandin mozexane ye  
Dîwarên xezînen wî diherifin  
Û derûn di geryanê de toze  
Tîrêje.  
Tu dibêjî şer jî  
Dest bi cot u avdanê kiriye  
Û stiranên di qafên pehin de dibêje,  
Dengê miriyan divegrîne  
Û ponjînen wan di golekî hişk de.” (T.S.  
Aliyot)*

Gotin li vê derê eve, em kengî hizira nû dibînin, aya her peyveke bihête nivîsandin nûyatîyê bi xwe re dihîne, bê gûman em ê bibêjin nexêr. Ji ber ku nûyatî weke bihara vê sala ku em tê de ne, li hêviya biharêne ku em bibînin gelo wê çawa be. Helbet her yek ji me biharek di hizira wî de heye berî ku bihar bihê, lê em vê jî dizanin ku wê ev bihar ne weke ya sala çûy be, wesana jî helbest û nûjenî, an ku helbesta nû û rênmayên wê, gelek caran dema em dîwanekî helbestan dixwînin ku li van demê dawî derdikevin, an ku di kovar, rojname û malperên enternêti de ji wan re dibêjin ku filan û bêvan helbestvanî dîwana xwe li gor helbesta nûjen nivîsandiye, an ku wê bibêjin ku tevlihev kiriye û kilasîk û nûjen kiriye şewazek, lê ev pirsiyare nehête kirin: "gelo mirov dema wê dîwanê dixwîne, hizirekî nû, xemleke nû, cilekî nû dibîne yan ne?" Bê guman emê bibêjin 75% nûyatî tê de nîne belku çend hestên xweş û dilvekerin. Li vê derê, divê nivîskar û rewşenbîr hindekî objektîf bin, rastiya wan helbestan ji xwendevanî re derxin ne ku pesindar bin û ji bo dilê hev xweş bikin, helbestvan jî divê wê hizirê bike ku ew çî pêşkêşî xwendevanî dike, aya helbestê xwe pêşkêşî xwendevanî dike, an jî mezinatiya navê xwe.

Helbesta nû ewe ku em di nav de hizirên ku li pişt hizirên me veşartî bibînin û wê cîhana tevlihev ji bo me aşkera bike, da ku rastî nemîne daleqandî, divê ew jî weku beşekî

xwedî erk be di avakirina bîra civakê de tenê maye.

*"Ji bo çî ditirsî ji mirinê,  
Ma qey tu çî caran nemirî?  
Ji bîra te çû, li mirina dûmahiyê,  
Min bi ava kaniya Sipî tu  
veşûştî*

*Ji bo çî hez ji jiyanê dikî?  
Salehan sale û tu dijî  
Û hêj tu bi xwe xewnekî di rastyê  
de"*

**(nimûneyeke ji bo pêhisiyana nakokîya hizirî)**

*(ji helbesta Ka destê te. Sebrî Silêvanî)*

Arîşeya helbesta kurdî ya herî serekî di vê qonaxê de ewe ku nikare nûyatîya xwe li gor nûyatîya civakê biguncîne, yan li paş civakê dimîne, yan jî bi kîlometaran ji civakê dûr dikeve, yan jî helbesta kolankî dihê nivîsandin û her kes dibêje ez yê herî nûjen im û yê herî baş im ku helbesta nûjen dinivîsim. Helbestvan bi gotina nûjeniyê ve xwe dixapîne, an ku bi xwe dide bawerkirin ku wî helbesteke nûjen nivîsiye.

Di encam de heger em bibêjin nûjenî, pêdiviyê hizireke nû li gel xwe bîne, cîhaneka hizirî ya nû li gel xwendevanî biafrîne, valatîyekî tijî bike, bibe nimûneya hizirî ya ku di mêjiyê mirov de keftûleftê dike. Erk li vê derê ewe ku ew nivîskar jê re nav deyne ne ku nav ji bo peyda bike û ji derdorên bîne.